



Wyša lěkarka dr. Cornelia Meißner a sotra Karin Lauke (wotlěwa) staratej so hromadže z dalšimi lěkarjemi a sotrami wo pacientow na nowej paliatiwnej staciji Kamjenskeje chorownje maltezew.

Foto: R. Löb

## Paliatiwna stacija wotewrjena

### Wjelětne prócowanja maltezew w Kamjenskeje chorowni so wudanili

**Kamjenc** (SN/mwe). Sakska statna ministerka za strowotnistwo a socialne Christine Clauß (CDU) je ze sobudźelačerkami wčera w Kamjenskeje chorowni maltezew w přitomnosći prošenych hosći kaž zapóslanca Sakskeho krajneho sejma Alojasa Mikławška (CDU), Kamjenskeho wyšeho měščanosty Rolanda Dantza (njestronjan), wjesnjastow regiona, lěkarjow, ewangelskich a katolskich fararjow paliatiwnu staciju wotewrěła. Wšitcy móžachu sej rumnosće wobhladać, w kotrychž jich medicinski personal witaše. „Z wul-

kim wjeselom zdźělamy, zo su so wjelětne prócowanja wo tajku staciju w chorowni swj. Jana skónčnje wudanili“, zwurazni překupska direktorka lěkowarnje Regina Klaus. We wobłuku plana klinikow 2014/2015 je Kamjenska chorownja wot Sakskeje připrajenje za wotewrjenje stacije ze šěsć ložemi dóstała. Přetwarjenske dźěła su zakónčene. Nowa stacija, wotpowědowaca wšém trěbnym kwalitatiwnym wuměnjenjam, je 1. apryla přěnich pacientow přijimala.

Na smjerć schorjenym su nimo naj-

lěpšeho medicinskeho zastaranja tež fyzi-, psycho- a hudźbnoterapeutiske poskitki k dispoziciji, tež dušepastyrjo su jim poboku. Nowa stacija je swětla, štyristwy z jednym ložom a jedna z dwěmaj ložomaj su rjenje a modernje wuhotowane. K paliatiwnemu dźěleju chorownje slušeja kuchnja z bydlenkej stwu kaž tohorunja rumnosć za bjesadu a lěkowanju. Wažne je, zo maja pacienća swój měr.

Z wotewrjenjom stacije maltezojo w Kamjencu dołhu tradiciju nałożowanja paliatiwneje mediciny zaměrnje dale wjedu. „Běchmy sobu ćí přěni, kotřiž su w Němskej ambulantne a stacionarne paliatiwne a hospicne stacije zarjadowali. Chcemy tuž tež w Lessingowym měsće swoju wědu nałożować“, rjekny jednačel maltezew dr. Alex Blaicher.